

সভ্যতা ও সংস্কৃতি বিকাশে প্রাচীন গ্রন্থাগারের ভূমিকা: একটি বিশ্লেষণ

মো. রফিকুল ইসলাম

প্রকাশ: ৮ মে, ২০২২; লাইব্রেরিয়ান ভয়েচ (<http://www.librarianvoice.org>)

মানবসভ্যতা ও সংস্কৃতির বিকাশের সঙ্গে সঙ্গে গ্রন্থাগার বিকাশলাভ করেছে। সপ্তম শতাব্দীতে গান্ধার, তক্ষশীলা ও কাশ্মীর প্রভৃতি স্থানের বৌদ্ধবিহারে সুপরিচালিত গ্রন্থাগার ছিল। সেই সময়ে বিহার ও মন্দিরে গ্রন্থাগার ছিল এবং ব্যক্তিগত গ্রন্থাগারও ছিল অসংখ্য। সুমেরিয়ানরা আনুমানিক ২,৭০০ খ্রিস্টপূর্বাব্দে মন্দির ও রাজপ্রাসাদ বা ব্যক্তিগত সংগ্রহের জন্য গ্রন্থাগার প্রতিষ্ঠা করেন। প্রাচীন নগরী বোরিসপা-র গ্রন্থাগার ব্যাবিলনীয় সভ্যতার উজ্জ্বল দৃষ্টান্ত। মাটির ফলকে লেখা গ্রন্থগুলি নকল করে আসীরিয় আসুরবানিপাল তাঁর নিনভের গ্রন্থাগারটি সমৃদ্ধ করেছিলেন।



প্রত্নতাত্ত্বিকদের গবেষণায় বিশ্বের প্রথম গ্রন্থাগারের পরিচয় পাওয়া যায়। যা প্রাচীন ব্যাবিলনে সেমিটিক সাম্রাজ্যের প্রতিষ্ঠাতা প্রথম সারগনের রাজধানী আক্বাদে। আনুমানিক খ্রিস্টপূর্ব সপ্তদশ শতকে এই গ্রন্থাগারটি স্থাপিত হয়েছিল। ব্যাবিলনের মারি রাজ্যের রাজধানীর প্রাসাদের গ্রন্থাগারে কুড়ি হাজারেরও বেশি পোড়ামাটির ফলক পাওয়া যায়। তবে প্রাচীন মেসোপটেমিয়া ও ব্যাবিলনিয়ার বিস্তীর্ণ ভূখণ্ডে বহু রাজ্যে সংগঠিত গ্রন্থাগারের অস্তিত্বের প্রমাণ পাওয়া যায়। বিশ্বের প্রথম গ্রন্থাগারিকের যে-পরিচয় পাওয়া যায়, তিনি খ্রিস্টপূর্ব সপ্তদশ শতকে জীবিত ছিলেন বলে অনুমান করা হয়। খ্রিস্টপূর্ব সপ্তম শতকে ব্যাবিলনীয় সাম্রাজ্যের পতন হওয়া পর্যন্ত প্রায় দেড় হাজার বছর মেসোপটেমিয়া ও ব্যাবিলনীয় রাজ্যগুলিতে গ্রন্থাগারের প্রভূত উন্নতি হয়েছিল। খ্রিস্টপূর্ব সপ্তম ও ষষ্ঠ শতাব্দীতে গ্রিক সম্রাটদের বিশাল গ্রন্থাগার ছিল। খ্রিস্টপূর্ব পঞ্চম শতাব্দীতে ইউরিপিডিস ও অন্যান্য পণ্ডিতদের ব্যক্তিগত গ্রন্থাগার নানা বিষয়ে সমৃদ্ধ ছিল। অ্যারিস্টটলের ব্যক্তিগত গ্রন্থাগারে সংগ্রহ ছিল যেমন বিপুল, তেমনই বৈচিত্র্যপূর্ণ। তাঁর গ্রন্থাগারে মানবজ্ঞানের সবগুলো শাখার উপর রচিত গ্রন্থ ছিল।

হেলেনীয় যুগে মিশরের আলেকজান্দ্রিয়া ও এশিয়া মাইনরের পারগমাম প্রভৃতি নগরে গ্রন্থাগার ছিল। আলেকজান্দ্রিয়াতে প্রথম টলেমি (খ্রিস্টপূর্ব ৩০৫-২৮৩) পণ্ডিতদের জন্য একটি গবেষণা প্রতিষ্ঠান ও গ্রন্থাগার প্রতিষ্ঠা করেন। পরবর্তীকালে টলেমিরা সেই গ্রন্থাগারকে আরও সমৃদ্ধশালী করেছিলেন। এই গ্রন্থাগারে দু-লক্ষেরও অধিক গ্রন্থ ছিল। খ্রিস্টপূর্ব প্রথম শতাব্দীতে এর গ্রন্থসংখ্যা ছিল সাত লক্ষেরও বেশি এবং আলেকজান্দ্রিয়ায় দ্বিতীয় গ্রন্থাগার সেরাপিয়াসে ছিল এক লক্ষেরও অধিক গ্রন্থ। গ্রন্থাগারগুলির সম্পদসমূহ ছিল সুবিন্যস্ত। আলেকজান্দ্রিয়া ও পারগমামের গ্রন্থাগারগুলি কয়েকশত বছর ধরে ধারাবাহিক সংগ্রহে পুষ্ট হয়েছে। পাঠকের ব্যবহারোপযোগী গ্রন্থতালিকা প্রণয়ন করেছে। গ্রন্থ সম্পাদনা করে জ্ঞানচর্চার সহায়তা করেছে এবং অধিকসংখ্যক গ্রন্থাগার স্থাপন করে জ্ঞানের আলো বিকিরণে উল্লেখযোগ্য ভূমিকা পালন করেছে।

খ্রিস্টপূর্ব তৃতীয় শতাব্দীতে গ্রিক সংস্কৃতির দ্বারা রোমকরা প্রভাবিত হয়। রোমান অভিজাত ও সেনাধ্যক্ষের ব্যক্তিগত গ্রন্থাগার ছিল। ব্যক্তিগত গ্রন্থাগার সামাজিক প্রতিষ্ঠার অন্যতম সোপান বলে পরিগণিত হতো। সিসেরার (খ্রিস্টপূর্ব ১০৬-৪৩) একাধিক ব্যক্তিগত গ্রন্থাগার ছিল। রোমান সাম্রাজ্যের সর্বত্র মূল্যবান গ্রন্থাগার স্থাপিত হয়েছিল। জুলিয়াস সিজার সাধারণ গ্রন্থাগারের চিন্তাভাবনা করেছিলেন। তিনি চেয়েছিলেন তাঁর প্রজাদের মধ্যে গ্রিক ও রোমান সাহিত্যের ব্যাপক প্রচলন হোক। সকলেই শিক্ষিত হোক ও গ্রন্থপাঠে উদ্বুদ্ধ হোক। গ্রন্থপাঠ সাংস্কৃতিক চেতনা প্রসারে সহায়ক হোক। সেই উদ্দেশ্যে তিনি সব গ্রন্থাগারের দ্বার সকলের জন্য উন্মুক্ত করে দিয়েছিলেন। প্রথম ও দ্বিতীয় শতাব্দীতে কেবল রোমেই পঁচিশটিরও বেশি সাধারণ গ্রন্থাগার প্রতিষ্ঠিত হয়েছিল। রোমান সাম্রাজ্যের বিস্তারের সঙ্গে সঙ্গে রোমান সংস্কৃতিরও ব্যাপক আকারে প্রসার ঘটেছিল। আর ইতালি, গ্রিস, এশিয়া মাইনর ও উত্তর আফ্রিকা প্রভৃতি রোমান সংস্কৃতির দ্বারা পুষ্টপ্রাপ্ত হয়েছিল এবং গ্রন্থাগার প্রচারের দ্বারা

সাংস্কৃতিক চেতনার উন্মেষ ঘটেছিল।

বাগদাদের স্বর্ণযুগে খলিফা হারুন-অর-রশিদের সময়ে আরবের ঐতিহাসিক ওমর-আল-ওয়াকিদির যে-পরিমাণ বই ছিল তাতে একশ কুড়িটা উট বোঝাই হয়ে যেত। ৮১৩ খ্রিস্টাব্দে হারুন-অর-রশিদের পুত্র খলিফা আল-মামুন ‘জ্ঞানভাণ্ডার’ নামে একটি গ্রন্থাগার প্রতিষ্ঠা করেন। পরবর্তীতে একে একে মাদ্রাসা স্থাপিত হতে থাকে। দ্বাদশ শতাব্দীতে সেখানে ছত্রিশটি গ্রন্থাগার ছিল। এর মধ্যে একটির বইয়ের সংখ্যা ছিল দশ হাজার। কিন্তু দুর্ভাগ্যক্রমে সবই ১২৫৮ খ্রিস্টাব্দে মোগল-আক্রমণের ফলে ধ্বংস হয়ে যায়। এ-ছাড়াও আরবি সাহিত্যের রেনেসাঁ রচনার ক্ষেত্রে গ্রন্থাগারের ভূমিকা উল্লেখযোগ্য।

তবে গ্রন্থাগার প্রতিষ্ঠায় আরব জাতি ইউরোপীয়দের তুলনায় অগ্রগামী। আব্বাসী খিলাফতের (৭৫০-১২৫৮) শুরু হতে সকল খলিফারাই গ্রন্থাগার প্রতিষ্ঠা ও বইয়ের সংখ্যা বৃদ্ধি করার আন্তরিক প্রচেষ্টা অব্যাহতভাবে চালিয়ে যান। ফলে প্রাচীন নগরী বাগদাদ ও বসরায় বড় বড় গ্রন্থাগার গড়ে ওঠে। যা আরব ও মুসলিম জাতির ঐতিহ্য ও গৌরবের বিষয় ছিল। কিন্তু আব্বাসীয়দের পতনকালে হালাকু খানের নেতৃত্বে তাতাররা হামলা, অগ্নিসংযোগ ও নদীতে নিক্ষেপ করে হাজার হাজার মূল্যবান গ্রন্থ ধ্বংস করেন—যা পৃথিবীর ইতিহাসে ন্যাকারজনক ঘটনা।

মিশরের প্রায় সকল মসজিদের সঙ্গে ছোটো বা বড় অসংখ্য আধুনিক গ্রন্থাগার ছিল এবং সেগুলোতে কোরআন, হাদিস, ফিকাহ ও ইতিহাস বিষয়ক অসংখ্য মূল্যবান গ্রন্থও ছিল। তাছাড়া অনেক মূল্যবান পাণ্ডুলিপিও সংরক্ষিত ছিল। তবে এসকল প্রাচীন গ্রন্থাগারগুলোর সঙ্গে আধুনিক পাঠাগারের তুলনা করলে সেগুলোকে সর্বোচ্চ গ্রন্থ-সংরক্ষণাগার বলা যেতে পারে। আরবি ভাষা ও সাহিত্য সংরক্ষণে ইউরোপে অনেক বড় বড় গ্রন্থাগার গড়ে ওঠে। সেগুলো প্রাচীন আরবি ভাষা ও সাহিত্যের অনেক দুস্প্রাপ্য গ্রন্থ ও পাণ্ডুলিপি যুগ যুগ ধরে সংরক্ষণ করে চলেছে। এগুলোর মধ্যে উল্লেখযোগ্য আধুনিক গ্রন্থাগারগুলো নিম্নরূপ:

১. বার্লিন গ্রন্থাগার, জার্মানি: যেখানে চৌদ্দ লক্ষ পঞ্চাশ হাজার মূল্যবান গ্রন্থ রয়েছে। ত্রিশ হাজার মূল্যবান পাণ্ডুলিপি রয়েছে। যার অধিকাংশই আরবি ভাষায় রচিত ছিল।
২. বন বিশ্ববিদ্যালয় গ্রন্থাগার: তিন লক্ষ এশষষ্টি হাজার ছয়শত তেষষ্টিটি গ্রন্থ রয়েছে এবং এক হাজার নয়শ একান্নটি পাণ্ডুলিপি রয়েছে।
৩. এক্সেরিয়াল গ্রন্থাগার, স্পেন: এই গ্রন্থাগারে পঁয়ত্রিশ হাজার পুস্তক রয়েছে। এর মধ্যে চার হাজার ছয়শ আটশটি পাণ্ডুলিপি ছিল।
৪. লাইডেন বিশ্ববিদ্যালয় গ্রন্থাগার, লাইডেন: এই গ্রন্থাগারে দুই লক্ষ পুস্তক রয়েছে। এর মধ্যে তিন হাজার ছয়শ গ্রন্থ প্রাচ্য ভাষাসমূহে লিখিত এবং অধিকাংশই আরবি ভাষায় রচিত।
৫. লন্ডন গ্রন্থাগার: এটি মূলত ব্রিটিশ জাদুঘরের একটি গ্রন্থাগার। এখানে আশি হাজার গ্রন্থ রয়েছে। যার একটি বড় অংশ আরবি ভাষায় রচিত পাণ্ডুলিপি।

৬. অক্সফোর্ড গ্রন্থাগার, অক্সফোর্ড: এই গ্রন্থাগারটি ১৫৯৮ খ্রিস্টাব্দে প্রতিষ্ঠিত হয়। এর গ্রন্থের সংখ্যা মোট সাত লক্ষ। এ-ছাড়াও ৩৩ হাজার আরবি পাণ্ডুলিপিও সংরক্ষিত আছে।

প্রাচ্যের আরবি গ্রন্থাগার:

উনবিংশ শতাব্দীর মাঝামাঝি সময় থেকে আরববিশ্ব পুনরায় আরবি ভাষা ও সাহিত্য সংরক্ষণের জন্য আধুনিক গ্রন্থাগার প্রতিষ্ঠায় এগিয়ে আসে। এক্ষেত্রে মিশর ও সিরিয়া অগ্রগামী। ইস্তাম্বুলে অনেক প্রাচীন গ্রন্থাগার রয়েছে। কারণ ইস্তাম্বুলকে ইসলামী-বিশ্বের রাজধানী মনে করা হয়। ইস্তাম্বুলের উল্লেখযোগ্য কয়েকটি বিখ্যাত গ্রন্থাগারের নাম এবং প্রতিষ্ঠাকালসহ নিম্নে উপস্থাপন করা হলো:

গ্রন্থাগারের নাম	প্রতিষ্ঠাতার নাম	প্রতিষ্ঠাকাল (হি.)	গ্রন্থসংখ্যা
সালীম আগা গ্রন্থাগার	আলহাজ্জ্ব সালীম আমিন	৯৫৫ হি.	০১,৩৮২
রুম্মা পাশা গ্রন্থাগার	শায়খ পাশা সদরুল আসবাক	৯৫৮ হি.	০০,৫৬০
আতিফ আফিনদী গ্রন্থাগার	মুস্তাফা আতিফ	১১০৪ হি.	০২,৮৫৭
আয়া সুফিয়া গ্রন্থাগার	সুলতান মাহমুদ আউয়াল	১১৫২ হি.	০৫,৩০০
আল ফাতিহ গ্রন্থাগার	সুলতান মাহমুদ আউয়াল	১১৫৫ হি.	০৬,৬১৪
ওলী উদ্দিন গ্রন্থাগার	শায়খ ওলী উদ্দীন	১১৮২ হি.	০৩,৪৮৪
আল উমুমিয়াহ গ্রন্থাগার	ওসমানী শাসকগণ	১২৯৯ হি.	৩৪,৫০০
ইয়ালদায় গ্রন্থাগার	সুলতান আব্দুল হামীদ	১২৯৯ হি.	২৬,৭৬০
মাতহাফ গ্রন্থাগার	ওসমান শাসকগণ	১৩০৬ হি.	১৫,২৬০

মিশরের গ্রন্থাগার:

মিশরের বড় বড় গ্রন্থাগারগুলো কায়রোতে অবস্থিত ছিল। কোনো কোনো গ্রন্থাগার সর্বসাধারণের জন্য উন্মুক্ত ছিল। আর কোনো কোনো গ্রন্থাগার বিশেষ ব্যক্তিবর্গের জন্য নির্ধারিত। গ্রন্থাগারগুলো নিম্নে উপস্থাপন করা হলো:

১. দারুল কুতুবিল মিসরিয়্যা: মধ্যপ্রাচ্যের মধ্যে সর্ববৃহৎ গ্রন্থাগার। আরবি সাহিত্যের পুনর্জাগরণের কালে সরকারিভাবে এ-গ্রন্থাগারটি প্রতিষ্ঠা করা হয়। মুহাম্মদ আলীর সময়ে গ্রন্থাগার প্রতিষ্ঠার কাজ শুরু হয় এবং ইসমাদিল পাশার আমলে অর্থাৎ ১৮৭০ খ্রিস্টাব্দে কাজের সমাপ্তি ঘটে। আর সেখানে আশি হাজার বই সংরক্ষিত রয়েছে।

২. মাকতাবাতুল আযহারিয়া: অন্যান্য মসজিদের মতো মিশরের আযহারেও প্রাচীন গ্রন্থাগার ছিল। প্রাচীনকালে শুরুর দিকে বইয়ের সংখ্যা ছিল একশ নিরানব্বইটি এবং এগুলো সবই বিক্ষিপ্ত অবস্থায় ছিল। পরবর্তীতে ১৮৭৯ খ্রিস্টাব্দে সরকারি নির্দেশে এ-গ্রন্থাগারকে আধুনিক গ্রন্থাগারে রূপান্তরিত করা হয় এবং প্রয়োজনীয় গ্রন্থাদি সংগ্রহ করা হয়। যেখানে ছত্রিশ হাজার ছয়শ তেতাল্লিশটি বই রয়েছে। তার মধ্যে পাণ্ডুলিপির সংখ্যা ছিল দশ হাজার নয়শ বত্রিশটি।

৩. মাকতাবাতুল আরুকাহ ফিল আযহার: এটি আযহারের অপর একটি গ্রন্থাগার। যা ১৯১৪ খ্রিস্টাব্দে প্রতিষ্ঠা করা হয় এবং সেখানে ত্রিশ হাজার বই সংরক্ষিত রয়েছে।

৪ . মাকতাবাতুল মাসাজিদ ওয়া দারুল আছার: ১৯১৪ খ্রিস্টাব্দে এ-গ্রন্থাগারটি প্রতিষ্ঠালাভ করে। সেখানে ত্রিশ হাজার পাঁচশ সাতষট্টিটি বই সংরক্ষিত রয়েছে।

৫. আল মাকতাবাতুল খেদীভিয়াহ: এটি মিশরে অবস্থিত এবং একটি বিখ্যাত গ্রন্থাগার। যা মুহাম্মদ আলী পাশার শাসনামলে প্রতিষ্ঠিত হয়।

তাছাড়া মিশরে বিভিন্ন শিক্ষা প্রতিষ্ঠান-সংশ্লিষ্ট শিক্ষার্থীদের জন্য অধ্যয়ন ও গবেষণার জন্য গ্রন্থাগার গড়ে ওঠে। যেমন:

ক. মাকতাবাতুল কুল্লিয়াতিল হুকুক: ১৯১৪ খ্রিস্টাব্দে এটি প্রতিষ্ঠিত হয়। সেখানে বিভিন্ন বিষয়ে উনিশ হাজার নয়শ পঞ্চাশটি বই সংরক্ষিত এবং শিক্ষার্থীদের গবেষণার জন্য স্বতন্ত্র হলরুমও ছিল।

খ. মাকতাবাতুল কুল্লিয়াতিত তিব: সেখানে চিকিৎসা ও পদার্থবিজ্ঞান বিষয়ক ফরাসি, ইংরেজি ও আরবি ভাষায় প্রায় দশ হাজার বই সংরক্ষিত রয়েছে। এ-গ্রন্থাগারটি মেডিকেল কলেজের ছাত্রদের জন্য নির্ধারিত ছিল।

গ. মাকতাবাতুল জামি'আতিল মিসরিয়্যা: ১৯১৪ খ্রিস্টাব্দে এ-গ্রন্থাগারটি প্রতিষ্ঠালাভ করে। তবে এগারো হাজার নয়শ ত্রিশটি গ্রন্থের সংগ্রহ রয়েছে। অধিকাংশ গ্রন্থই লেখক ও সাহিত্যিকদের উপহারস্বরূপ পাওয়া।

ডলবিয়া ও লেবাননের গ্রন্থাগার:

মিশর ও ইউরোপের ন্যায় সিরিয়া ও লেবাননেও বেশ কিছু প্রসিদ্ধ গ্রন্থাগার গড়ে ওঠে। আরবি সাহিত্যেও পুনর্জাগরণে এসব গ্রন্থাগারের ভূমিকাও কোনো অংশে কম নয়। গ্রন্থাগারগুলো নিম্নরূপ—

ক. 'আল মাকতাবাতুল যাহিরীয়াহ', দামেস্ক, ১৮৭৮

খ. 'আল মাকতাবাতুল শারকিয়াহ', বৈরুত, ১৮৮০

গ. 'মাকতাবাতুল জামি'আতি বৈরুত আল আমরীকিয়াহ'

ঘ. 'মাকতাবাতুল মাদরাসাহ আল আহমাদিয়াহ', আলেক্সো, সিরিয়া

ঙ. 'মাকতাবাতুল মাদরাসাহ আল রিদাইয়াহ', আলেক্সো, সিরিয়া

চ. 'আল মাকতাবাতুল মারুনিয়াহ', আলেক্সো ও সিরিয়া, ১৭২৫ খ্রিস্টাব্দে এ-গ্রন্থাগারটি

খ্রিস্টান মিশনারিরা প্রতিষ্ঠা করেন।

প্রাচীন পারস্যে ব্যক্তিগত এবং অনেক সাধারণ গ্রন্থাগার ছিল। সেদেশে জ্ঞানচর্চার বিশেষ কদর ছিল। বোখারাতে চিকিৎসক-দার্শনিক আবু-আলি-ইবন সিনা (অর্থাৎ অবিচেন্না ৯৮০-১২১৭ খ্রিস্টাব্দে) সুলতান ইবনে মনসুরের প্রাসাদ-গ্রন্থাগার সম্পর্কে বলেন, সেখানে একটা ঘরে আরবি ব্যাকরণ ও কবিতা এবং আরেকটা ঘরে আইনের বই; এমনিভাবে প্রতিটি বিষয়ের জন্য আলাদা কামরা ছিল। পণ্ডিত ইবনে আব্বাসের আমলে অর্থাৎ ৯৩৮-৯৯৫ খ্রিস্টাব্দে চারশ উট বোঝাই পুঁথি ছিল। আর তার সূচি বা ক্যাটালগ ছিল দশ খণ্ডে। নিশাপুর ইম্পাহান, বসরা, সিরাজ ও মসুল প্রভৃতি প্রতিটি শহরে গ্রন্থাগার ছিল।

ইংল্যান্ডের গ্রন্থ-ইতিহাস বেশি পুরোনো নয়। ৬৭৮ খ্রিস্টাব্দে রেনেভিস্ট বিশপ রোম থেকে বই সংগ্রহ করে তাঁর জন্স্থান নর্দামব্রিয়াতে প্রতিষ্ঠিত ওয়্যার মাউথ মঠে একটি গ্রন্থাগার প্রতিষ্ঠা করেন। ৬৭০-৭৩৫ খ্রিস্টাব্দের মধ্যে সে-দেশে অনেক গ্রন্থাগার গড়ে ওঠে। ৮৭৫ খ্রিস্টাব্দে নিনেমা'র আক্রমণের ফলে বহু সংগ্রহ নষ্ট হয়ে যায়। তার মধ্যে বিখ্যাত ইয়র্ক ও ক্যান্টারবেরি সংগ্রহও ছিল। দশম শতাব্দিতে উইনচেস্টার, উসেস্টার ও ক্যান্টারবেরি গ্রন্থাগার উল্লেখযোগ্য। ক্যান্টারবেরি ক্রাইস্ট চার্চের যে-গ্রন্থতালিকা এন্ড্রিয়ার প্রায়র হেনরি (১২৮৫-১৩৩১ খ্রিস্টাব্দে) প্রস্তুত করেছিলেন তাতে তিন হাজার বইয়ের নাম পাওয়া যায়।

মানবসভ্যতার প্রথম উষার আলো পড়েছিল মধ্যপ্রাচ্য ও মিশরে। ভারতবর্ষে মানবসভ্যতার উন্মেষকাল মধ্যপ্রাচ্যের কালসীমার প্রায় সমসাময়িক। খ্রিস্টপূর্ব তিন হাজার থেকে আড়াই হাজার বছরকালের মধ্যে ভারতে সিন্ধুসভ্যতার বিকাশ লাভ করে। ভারতীয় প্রাচীন সভ্যতা যে খুবই উন্নত ছিল তার প্রমাণ পাওয়া যায়। তখনকার জীবনযাত্রা ও বিভিন্ন ব্যবহার-সামগ্রী আসবাবপত্র ও উন্নত সংস্কৃতির জীবনধারায়। হরপ্পা ও মহেনজোদারোর স্বচ্ছল নাগরিক জীবনযাত্রা ও আর্থিক সঙ্গতিপূর্ণ গ্রামীণ সমাজ কেবল সভ্যতা নয় উন্নত সাংস্কৃতিক জীবনের পরিচয়ও বহন করে। সিন্ধুসভ্যতার সাংকেতিক চিত্রলিপি সমসাময়িক কালে খুবই আধুনিক ও অর্থবহ ছিল। প্রায় তিন শতকেরও অধিক চিত্রলিপি সিন্ধুসভ্যতার সময়ে ব্যবহৃত হতো। সহজেই অনুমান করা যায় যে, এতগুলি চিত্রলিপি দিয়ে লিখিত উপাদান তখন ছিল এবং তা সংরক্ষণের ব্যবস্থাও ছিল। প্রাকৃতিক বিপর্যয়ে ও প্রতিকূল প্রাকৃতিক পরিবেশের ফলে উত্তরকালের জন্য রক্ষিত উপাদানগুলি বিলীন হয়ে যায়।

নালন্দার অধ্যাপকদের পাণ্ডিত্যের সুখ্যাতি ছিল। তাই সহস্র সহস্র বিদ্যার্থীর শিক্ষার উপযুক্ত ব্যবস্থার জন্য একটি বিরাট পুস্তকভাণ্ডার নির্মাণ করে নালন্দা মহাবিহারের স্থাপয়িতা ও কর্ণধারগণ সংগঠনের দিক দিয়ে তাঁদের কর্মকুশলতা ও দূরদৃষ্টির পরিচয় দিয়েছিলেন। চীনা পরিব্রাজকদের বর্ণনা থেকে জানা যায় যে, এক সুবিশাল অঞ্চল গ্রন্থাগারভবনের জন্য নির্দিষ্ট ছিল। গ্রন্থাগার-ভবনটি বহুতল বিশিষ্ট ছিল। এদের মধ্যে তিনটি উল্লেখযোগ্য ভবনের নাম যথাক্রমে রত্নদধি, রত্নসাগর ও রত্নরঞ্জক। রত্নদধি নয়তলা বিশিষ্ট ছিল। লামা তারানাথ ও

অন্যান্য তিব্বতীয় পণ্ডিত সপ্তদশ ও অষ্টাদশ শতকে তাঁদের লেখার মধ্যে নালন্দার পুঁথি সংগ্রহের বিশালত্বের কথা উল্লেখ করেন। পরিরাজক উৎসিং এবং ইউয়ান চোয়াং এই নালন্দা মহাবিহার হতে যথাক্রমে ৪০০ এবং ২০০-র ওপর মূল গ্রন্থের প্রতিলিপি প্রস্তুত করে নিয়ে যান। এই তথ্য থেকেই নালন্দা মহাবিহারের সংগ্রহের সংখ্যাধিক্যের কথা সহজেই অনুমান করা যায়। তেরো শতকে তুর্কি-আক্রমণের ফলে নালন্দা মহাবিহার ধ্বংসপ্রাপ্ত হয়। মহাবিহার ধ্বংসের সঙ্গে এর গ্রন্থাগারটিও অগ্নিদগ্ধ হয়ে যায়।

বাংলাদেশের সাংস্কৃতিক ইতিহাস থেকে জানা যায় যে, খ্রিস্টপূর্ব তৃতীয় শতাব্দীতে মহাস্থানগড় ও ময়নামতিতে বৌদ্ধবিহার ছিল। সেসকল বৌদ্ধ-বিহারগুলি আবাসিক ছিল এবং প্রত্যেকটিতে সুসংগঠিত সমৃদ্ধ গ্রন্থাগার ছিল। ষোড়শ ও সপ্তদশ শতাব্দী হলো গ্রন্থাগার-আন্দোলনের স্বর্ণযুগ। তখন সারা বিশ্বের বিভিন্ন দেশে অসংখ্য গ্রন্থাগার গড়ে উঠেছিল।

গ্রন্থাগার প্রতিষ্ঠায় যেসকল দেশ অগ্রণী ভূমিকায় ছিল তার মধ্যে যুক্তরাজ্য, ফ্রান্স, ইতালি, জার্মানি, সোভিয়েত ইউনিয়ন (রাশিয়া), কানাডা, আমেরিকা ও ভারতের নাম বিশেষভাবে উল্লেখযোগ্য। মুসলমান রাজত্বকালে লিখনশিল্পের উন্নতির অন্যতম কারণ ইসলাম ধর্মের সার্বজনীনতা। সমাজের কোনো স্তরবিশেষে শিক্ষা সীমাবদ্ধ না থাকতে সকল সম্প্রদায়ের মধ্যে পুস্তক ব্যবহারে কোনো সামাজিক বাধা ছিল না। লিখনশিল্পের দ্রুত উন্নতির ফলে পুস্তক প্রণয়ন ও তার ব্যবহারও ক্রমশ বৃদ্ধি পেতে থাকে এবং মসজিদ, মাদ্রাসা ও মক্তবে কিছু কিছু পুস্তক-সংগ্রহ গড়ে ওঠে বলে জানা যায়।

মুসলমান বাদশাহদের মধ্যে অনেকেই পুস্তকের প্রতি অনুরাগী ছিলেন। তুঘলকের রাজত্বকালে রাজপ্রাসাদে গ্রন্থাগার বা কিতাবশালা ছিল। ১৬৬২ খ্রিস্টাব্দে দিল্লির রাজকীয় গ্রন্থাগারে ২৪,০০০ পুস্তক বা পুঁথি ছিল। হুমায়ূন, আকবর, জাহাঙ্গীর, শাহজাহান ও আলমগীর প্রমুখ সকল মোগল বাদশাহই পুস্তকের অনুরাগী ছিলেন। হুমায়ূন শেরশাহের 'সেরমগুল' নামক বিশাল প্রসাদটিকে রাজকীয় গ্রন্থাগারে রূপান্তর করেন। আকবরের রাজত্বকালে রাজকীয় গ্রন্থাগারের প্রভূত উন্নতি হয়। আকবরের রাজকীয় গ্রন্থাগারে ২৫,০০০ বই ও পাণ্ডুলিপি সংরক্ষিত ছিল। টিপু সুলতানের সুপ্রসিদ্ধ গ্রন্থাগার ছিল। যা যুদ্ধের সময় লুণ্ঠিত হয়। শেষ পর্যন্ত এই সমৃদ্ধ সংগ্রহ ব্রিটেনে নিয়ে যাওয়া হয় এবং বর্তমানে তা লন্ডন শহরে কমন্ওয়েলথ অফিসের ইন্ডিয়ান অফিসের গ্রন্থাগারটিতে সংরক্ষিত রয়েছে।

সভ্যতার ক্রমবিকাশের সঙ্গে সঙ্গে জ্ঞান ও তথ্য-সংরক্ষণ প্রক্রিয়া উন্নত হতে থাকে। দেশে দেশে প্রতিষ্ঠিত হয় নানা ধরনের গ্রন্থাগার। বর্তমান যুগকে এককথায় জ্ঞান-বিজ্ঞানের উৎকর্ষের যুগ বলা যায়। মানুষ আজ পাতালপুরী থেকে আকাশে চড়ে বেড়াচ্ছে। মহাকাশ জয়ের নেশায় মত্ত। তাই মানুষ যতই উন্নতির শিখরে উঠছে, ততই গ্রন্থাগার-নির্ভরশীল হয়ে পড়ছে। তার সাধনা, গবেষণা ও অনুসন্ধান ক্রমেই গ্রন্থাগারমুখী হয়ে উঠছে। বিংশ শতাব্দীতে গ্রন্থাগারে বই ও পত্রপত্রিকা সংরক্ষণের পাশাপাশি ফিল্ম, ফিল্মস্ট্রিপ, ম্যাগনেটিক

টোপ, মাইক্রোফিস, মাইক্রোফিল্ম ও কম্পিউটার ইত্যাদি আধুনিক সামগ্রীতে সমৃদ্ধ ছিল। বর্তমানে তথ্য-প্রযুক্তিযুগে গ্রন্থাগারসেবার মান উন্নয়নের জন্য বিভিন্ন ধরনের গ্রন্থাগার-সফটওয়্যার গ্রন্থাগারে ব্যবহৃত হচ্ছে। যেমন- Librarz Software: KOHA and GREENSTONE, DSpace and RFID -Digital Librarz Software ও ইন্টারনেট। এ-ছাড়াও বিভিন্ন ধরনের উন্নতমানের Software গ্রন্থাগারে ব্যবহার করা হচ্ছে।

তথ্যসূত্র:

১. মোহাম্মদ মনিরুজ্জামান, সম্পাদিত, মুহাম্মদ সিদ্দিক খান রচনাবলী -১; ঢাকা, বাংলা একাডেমি, ১৯৯৪
২. সুলতান উদ্দীন আহমাদ, আধুনিক গ্রন্থাগার ও তথ্যবিজ্ঞান সিরিজ-৫: গ্রন্থাগার ও তথ্যবিজ্ঞান স্বরূপ সন্ধান; ঢাকা, প্রগতি প্রকাশনী, ২০০০
৩. জুরজী যায়দান, তারীখু আদাবিল লুগাহ আল আরাবিয়্যায়; বৈরুত, দারুল ফিকর, ২০০৫
৪. জুরজী যায়দান, তারীখু আদাবিল লুগাহ আল আরাবিয়্যায়; বৈরুত, দারুল ফিকর, ৪র্থ খণ্ড, ২০০৫
৫. হান্না আল ফখরী, তারীখুল আদাবিল আরাবী; 'বৈরুত: আল মাতবা' আতুল বুলিসিয়্যায়, তা.বি.

ড. মো. রফিকুল ইসলাম

গ্রন্থাগার বিভাগের প্রধান

সাউদার্ন ইউনিভার্সিটি বাংলাদেশ, চট্টগ্রাম